

**PRU13 Masa Terbaik Rakyat Kelantan Tukar Kerajaan - Najib Bernama
2 Mei, 2013**

KOTA BAHARU, 2 Mei (Bernama) -- Menjelang penghujung kempenya di pantai timur, Datuk Seri Najib Tun Razak Khamis meniup semangat rakyat Kelantan apabila menegaskan pilihan raya umum kali ini merupakan masa paling sesuai untuk rakyat negeri ini menukar kerajaan.

Perdana Menteri yang juga Pengerusi Barisan Nasional (BN) berkata suasana politik di Kelantan ini kini dilihat lebih baik berbanding ketika pilihan raya umum pada 2004 dan 2008, yang memberi indikasi sokongan rakyat semakin cenderung kepada BN.

"Peluang berjumpa orang Kota Bharu hari ini saya nak tanya adakah suasana hari ini lebih baik daripada 2004, 2008?"

"Kalau hari ini lebih baik, saya nak isytiharkan tahun ini sebagai tahun Kelantan tukar kepada BN...kalau tahun ini tak tukar jugak saya tak tahu la bila lagi," katanya yang disambut sorakan kira-kira 15,000 warga Kota Bharu yang berkumpul di Maktab Sultan Ismail di sini.

Hadir sama Pengerusi BN Kelantan Datuk Seri Mustapa Mohamed, Timbalan pengerusi Datuk Dr Awang Adek Hussein, calon BN bagi parlimen Kota Bharu Datuk Mohd Fatmi Che Salleh, calon bagi kerusi Dewan Undangan Negeri (DUN) Bunut Payung, Mohd Fakhrurazi Abdul Rahim, Tan Ken Ten (Kota Lama) dan Kanidy Omar (Tanjung Mas).

Najib berkata rakyat Kelantan mempunyai masa tiga hari lagi untuk menentukan pilihan mereka seterusnya menjamin perubahan dibawa di negeri ini.

Menyifatkan rakyat Kelantan mempunyai ramai golongan cerdik pandai, Najib bagaimanapun berkata masih ada yang tidak 'molek' di Kelantan kerana masih mengekalkan kepimpinan politik yang sudah terlalu lama dan tidak mampu melakukan perubahan.

"Kalau nak mentadbir negara harus ada kepimpinan yang mampu terima idea baharu, mestilah kepimpinan yang segar, boleh membawa perubahan kepada negara," katanya.

Sebaliknya di Kelantan, kata Najib, kepimpinan politik yang diterajui PAS sudah tidak kena pada tempatnya, malah selama 23 tahun mentadbir negeri ini parti itu terus menabur janji-janji kosong kepada rakyat.

"Nak buat highway (lebuhraya) Kuala Krai ke Kota Bharu minta RM2.5 juta daripada rakyat...berapa yang orang boleh bagi? Soalnya sekaligus memberi aku janji lebuhraya itu akan dilaksanakan sekiranya mandat diberi kepada BN pada pilihan raya umum 5 Mei ini.

Menyentuh kepimpinan Menteri Besar Datuk Nik Abdul Aziz Nik Mat pula, Najib berkata Mursyidul Am PAS itu seharusnya merenung keadaan dirinya sebelum menawarkan diri untuk bertanding sekali lagi pada pilihan raya umum kali ini.

Najib berkata beliau menghormati Nik Aziz sebagai orang yang lebih tua tetapi hakikat Nik Aziz berusia 80an menjurus kepada persoalan sama ada beliau mampu bercakap soal pembaharuan di abad ke-21 ini.

Mengambil contoh dasar kepimpinan di China, Najib berkata mereka mempunyai dasar bahawa kepimpinan utama akan bersara apabila mencapai umur 70-an.

"Kalau nak jadi mursyidul am tak apalah, tetapi kalau nak tadbir negara seorang pemimpin harus ada idea baharu, mestilah pemimpin yang segar dan mampu membawa pembaharuan," katanya.

Najib sekali lagi mengingatkan rakyat bahawa pilihan raya umum kali ini amat penting kerana ia akan menentukan destini negara dan bukannya siapa yang akan menjadi pemimpin.

"Sebab itu kita mesti pilih parti dan pemimpin yang ada wawasan, ada agenda yang mampu membawa perubahan pada negara, ada kebolehpercayaan untuk memenuhi harapan esok bagi menjamin hari esok lebih baik daripada hari ini," katanya.

Najib seterusnya memberi aku janji untuk membawa Malaysia ke mercu jaya sekiranya terus diberi mandat yang kuat pada hari pengundian yang akan berlangsung Ahad ini.

Terdahulu, Najib melancarkan program Tuisyen 1Malaysia, anjuran Yayasan Orang Kota Baharu bertujuan menyediakan program pemberian kelas tambahan percuma kepada pelajar miskin di negeri ini yang akan menduduki peperiksaan awam.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=946929>